

Comataidh Inbhean MG ALBA

BBC, Pacific Quay, Glaschu

Diluain 11 Gearran 2019, 1030-1330

Dreach geàrr-chunntas

Buill: Iain Stephen Moireasdan (*sa Chathair*) Jo NicDhòmhnail
Calum MacFhearghais

Luchd-obrach: Dòmhnall Caimbeul (*An t-Àrd-Oifigear*)
Iseabail Nic an t-Sagairt (*Stiùiriche Ro-innleachd is Co-bhanntachd*)
Bill MacLeoid (*Deasaiche Coimiseanaidh*) - *airson puing 6*
Mairi Anna NicAonghais (*a' gabhail nòtaichean*)

An làthair: Mairead Màiri Mhoireach (*Ceannard Seirbheis*)
Chris Young (*Young Films*) – *airson puing 6a*

1. Leisgeulan

Ailean Dòmhnallach.

2. Gnothach Dearbhte

Dh'innis Calum MacFhearghais gu robh e air obair a dhèanamh air bhidiothan goirid mu bhall-choise airson LearnGaelic.

3. Geàrr-chunntas na coinneimh mu dheireadh: 13/11/18

Aontaichte.

4. Gnothaichean ag èirigh

LearnGaelic – chaidh innse gu robh còmhradh air a bhith ann le Bòrd na Gàidhlig mu bhith a' fastadh Manaidsear Ionnsachaidh. Ann am prionnsabal tha BnaG ceart gu leòr le cùisean ach thèid an tuilleadh còmhradh a dhèanamh gus rudan a thoirt gu buil. Chaidh innse cuideachd gu robh pàipear air beulaibh bòrd taobh a-staigh a' BhBC an ceartuir co-cheangailte ri bhith a' fastadh Leas-dheasaiche Ionnsachaidh, le dòchas gum biodh co-dhùnadh ann taobh a-staigh na bliadhna ionmhais seo. Thèid fios às ùr mun seo air beulaibh a' bhùird. (Gnìomh: MAMI)

Chaidh innse gu robh ùrachadh làrach LearnGaelic a' dol gu math le dùil gum bi gnothaichean ullamh agus foillsichte as t-samhradh.

Broadcast Content Fund Alba Chruthachail/BFI Young Audience Content (YAC) Fund – chaidh innse gun deach cuairt coimiseanaidh airson beachdan dràma clann aois 6-12 a-mach ron Nollaig agus gun deach dà bheachd a thaghadh a-mach à 12 tagradh, airson litir taic, gus an rachadh iad air adhart airson taic-leasachaidh. Tha am BBC air a bhith a' cnuasachadh an t-àite a th' aig am BBC a thaobh maoin am BFI YAC Fund. Cha bhi am BBC fhèin a' gabhail pàirt. Tha sin na bhacadh air BBC Gàidhlig (air cùl aon de na beachdan soirbheachail). Ach chaidh a dhearbhadh leis a' BhBC nach bi bacadh ann do BhBC ALBA a bhith a' craoladh stuth eile air a mhaoineachadh tron BFI.

Speakgaelic – chaidh innse gu robhas air freagairt fhaighinn bho Stiùiriche Nàiseanan agus Roinnean a' BhBC, a' moladh gun deigheadh com-pàirtean le ùidh a chuir an sàs còmhla gus an iomairt seo a thoirt gu buil. Thèid seo a dheasbad aig Bòrd na Co-bhanntachd agus aig a' Bhòrd.

5. Lèirmheas na ràithe mu dheireadh agus sùil air adhart

Bha pàipear air beulaibh bhall a' mìneachadh nan raointean-obrach a leanas: BBC ALBA; na meadhanan didseatach; Lèirsinn 2021; trèanadh, sgilean & tàlant agus luchd-amais. A thuilleadh air an sin, bha fiosrachadh air beulaibh bhall mu fios air ais bhon Phannal Gàidhlig airson àm na Nollaig agus na Bliadhn' Ùire, Plana Bhliadhnail Co-bhanntachd BBC ALBA agus clàr-ama airson seanail YouTube a chuir air chois. Thug an Stiùiriche Ro-innleachd is Co-bhanntachd iomradh orra.

BBC ALBA - chaidh deasbad a chumail mu àireamhan an luchd-coimhid. Chaidh aithneachadh a dhèanamh nuair a bha comadaidh, dràma agus prògraman beò dhan craoladh gu robh na h-àireamhan na b' àirde. Chaidh còmhradh a dhèanamh mun tuiteam ann an àireamhan luchd-coimhid na naidheachdan agus chaidh aontachadh gun deigheadh ceist a chuir air a' phannal. (Gnìomh: IMT). Chaidh prògraman na Nollaig agus prògraman mu na h-Iolaire a chomharrachadh agus chaidh moladh a thoirt don h-uile duine a bha an sàs annta.

Na meadhanan sòisealta – thog buill an cothrom a dh'fhaodadh a bhith an cois Instagram Stories air ùrlar Instagram is chaidh ceist a chuir mun ro-innleachd a thaobh Instagram Stories. Tillidh oifigearan le barrachd fios. (Gnìomh: IMT)

Chaidh fàs sna h-àireamhan a chomharrachadh agus chaidh fàilte a chuir air iomairt stuthan fèin-cruthaichte.

6a. Dràma – taisbeanadh bho Young Films

Chaidh fàilte a chuir air Chris Young bho Young Films chun choinneimh. Chunnacas taisbeanadh a' mìneachadh na tha Bannan air a libhrigeadh dhan luchd-coimhid agus dìleab sgilean teicnigeach agus sgrìobhaidh; amasan Young Films; seallaidhean air suidheachadh dràma Tbh na h-Alba agus àite dràma Gàidhlig san cho-theacsa sin; leasachadh tàlant agus taic airson riochdachadh cànan dùthchasail.

Chaidh a chomharrachadh cho cudromach 's a bha e gun tèid an fheum as fheàrr a dhèanamh bho cho-bhanntachdan ro-innleachdail le Alba Chruthachail.

Chaidh taing a' Chomataidh a bhuileachadh air Chris Young airson an taisbeanadh inntinneach.

6b. Còmhradh mu dhràma san fharsaingeachd

Bha pàipear air beulaibh bhall a' mìneachadh clàr-ama Sgioba Phrògraman na seanail a thaobh co-dhùnadh air dè thig an dèidh don phasgan seo de mhaoineachadh airson Bannan a thighinn gu crìoch ann an 2021.

Chaidh deasbad a chumail agus bha aonta ann gu robh tòrr diofar nithean ri smaoinachadh mu dheidhinn mus bi fios air an t-slighe air adhart. Thig pàipear nas cinntiche air beulaibh na Comataidh a dh'aithghearr, is bidh na diofair eileamaidean rin tomhas air an comharrachadh, nam measg: luach cruthachail nam beachd, feumalachdan an luchd-coimhid, luach brannd, dìleab Bhannan a thaobh sgrìobhaidh/stiùirichean/luchd-gearraidh is luchd-cùird eile, luach meud (an taca ri one-offs), comas companaidhean, agus luach airgid leasachaidh (gu ruige seo bho Riaghaltas na h-Alba airson Bannan). (Gnìomh: IMT)

Le dràma riatanach sa chlàr gu seach àraid airson luchd-coimhid òga, chaidh iomradh a thoirt air iomairtean dràma eile a bha a' dol an ceartuir, eadar Sgeama an EBU agus Dràma Cèine. Chaidh fàilte a chuir air na h-uiread de bheachdan a thàinig a-steach fo chuirtean coimeasaidh eadar-dhealaichte (Cuairt Coimeasaidh airson pròiseactan leasachaidh 2018/2019 airson Drama chloinne/Comadaidh). Cumaidh obair a' dol an fheadhainn as soirbheachail a thoirt gu buil. Chaidh iomradh a dhèanamh air dràma cèine agus an ro-innleachd air cùlaibh seo - stuthan mion-chànain agus/no aig an robh dàimh chultarach le luchd-coimhid na seanail. Chaidh fàilte a chuir air na h-iomairtean seo air fad.

7. Gàidhlig ann am prògraman

Bha pàipear air beulaibh bhall agus chaidh deasbad a chumail.

Chaidh a mhìneachadh nach eil poileasaidh na buidhne air atharrachadh bho 2015. Bha fiosrachadh air beulaibh bhall a' sealltainn fianais TRP thar 2018 co-cheangailte ri beachd luchd-coimhid mun ìre de Ghàidhlig labhairte ann am prògraman, le àrdachadh air a thighinn air a' mheasadh sin leis an luchd-coimhid.

Bha aon bhall den bheachd pearsanta gu robh piseach air thighinn air an ìre de Ghàidhlig ann am prògraman agus gu robh faireachdainn ann gu robh na companaidhean riochdachaidh a-nis a' toirt aithne agus àite nas motha do Ghàidhlig.

Bha buill riarachta nach robh feum air a' chòrr rannsachadh mionaideach a dhèanamh aig an ìre seo.

8. Trèanadh

Bha pàipear air beulaibh bhall agus chaidh deasbad a chumail.

Le amas ann an Lèirsinn 2021 a bhith a' togail comas nan riochdairean a thaobh na Gàidhlig, chaidh innse mu na diofar iomairtean a bha a' dol le na riochdairean eadar-dhealaichte. Chaidh a chomharrachadh, a thuilleadh air an cùrsa Gàidhlig a bha ga chuir air dòigh airson cuid a riochdairean, dh'fhaodadh gum biodh taic leantainneach a dhith.

A thuilleadh air sgilean Gàidhlig, chaidh innse mu na prìomhachasan ro-innleachdail co-cheangailte ri a) sgilean gearraidh, stiùiridh agus obraichean eile adhartachadh.; obair a bha a'

leantainn le Preantas Gàidhlig; taiceachadh Eadar-nàiseanachadh agus obair na Buidhne Comhairleachaidh Tbh. Bha buill riarachta le na h-iomairtean trèanaidh air fad.

9. FilmG

Bha pàipear agus aithisg air beulaibh bhall agus chaidh deasbad a chumail.

Chaidh ìre àrd na co-fharpais a chomharrachadh, le filmichean le cuspairean duilich, onarach, cumhachdach le sgilean gearraidh, sgrìobhaidh agus teicnigeach air an taisbeanadh. Bha aonta ann gu robh filmichean na bliadhna seo aig an ìre as àirde a bha iad a-riamh, a thuilleadh gu robh fàs air a bhith sna h-àireamhan de dh'fhilmichean. Bha oidhche nan duaisean cho brosnachail le daoine òga cho misneachail a' bruidhinn Gàidhlig air an àrd ùrlar. Chaidh moladh a dhèanamh air gu robh grunnan filmichean air nochdadh bho dhaoine air an ceann fhèin/gu neo-eisimeileach.

Chaidh innse gu robh TG4 a' coimhead ri pàirt a ghabhail ann am farpais Unesco CIAK 2019 agus chaidh a chomharrachadh gun deigheadh coimhead air am biodh e iomchaidh do FilmG. (Gnìomh: IMT)

Chaidh còmhradh a chumail mu cho cudromach 's a bha e gum biodh cuid de na filmichean a' nochdadh air BBC ALBA.

Chaidh obair Cànan a chomharrachadh agus thèid còmhradh a chumail leotha gus faicinn ciamar a gheibhar air togail air fìor dheagh obair na bliadhna seo airson na h-ath bhliadhna. Chaidh taing agus moladh na Comataidh a bhuileachadh air obair gach neach a tha an sàs sa cho-fharpais.

Chaidh taing airson agus moladh a thoirt don aithisg fiosraichte agus air a dheagh sgrìobhadh a bha air beulaibh bhall.

10. Aithisgean Dèanadais Q3 2018/18

Pasgan Air-loidhne – chaidh seo a chomharrachadh.

11. GISBE

Cha robh gin.

Ainm sgrìobhte a' Chathraiche:

Deit: